

1425

1417

斐

然

集

一九

聖

德

集

卷

欽定四庫全書

斐然集卷二十七

祭外舅張兵部

宋 胡寅 撰

承奉郎新除起居郎胡某謹以清酌庶羞之奠致祭于
故致政兵部大人之靈惟公受資敏哲秉德夷粹飭身
修行博學強記妙齡登策卑官自試不弛不競悠然卒
歲擢為御史排擊蔡氏即被汰斥曾不少愴還寘郎省

復要郡寄文昌羽儀太守豈弟周旋出入三已三仕公
時既老守道克必笑色溫如一坐和氣不義浮雲棄若
唾涕蔡門招之斂衽謹避竟不得汙以成其志惟公宦
遊踰五十祀其在京師舉子奏技疇咨衡鑑惟公是畀
錙銖罔忒妍醜莫蔽一時公卿多門下士奮身寒遠廩
肉既繼豐人約已脫粟布被平生嗜書白首益勵藏之
萬籤不以足意抄之龜手不以為勩掇其英華拔其根柢
發之文章奧雅精麗不自表襮狐裘反衣誰之不如雲

路獨躋訖無見知奄忽違世嗚呼哀哉宣和辛丑吾仕
初筮試於南宮萬人來萃公得其文手之不置擢于上
科見謂遠器妻以季女申篤情義登門受教盡發其秘
日聞格言飽識奇字別手都城後會難冀公守定陶我
官洛汭公歸甌閩我客淮泗心與雲飛跡若匏繫祝公
百齡庶得款侍一疾何遽電倏川逝病不執手奠不躬
醑斂不憑棺葬不臨隧死生永隔有淚如雨自公之歿
亂日益熾兵塵暗天流血滿地中原衣冠流落四裔孰

得耆老晏晏休致歸榮故鄉順命委蛻生雖不過死則
無媿如彼美玉今古所貴埋之佳城韞匱何異善積流
衍況有賢嗣終大公門亦復何喟

祭亡室張氏

維紹興七年歲在丁巳九月某日夫胡寅明仲謹遣香
燭酒茗果饌衣服歸祭亡室宜人張氏德馨四十三娘
之靈嗚呼哀哉與君因緣十有六年逮事翁姑最蒙撫
憐鞠養適庶大小滿前內外姻族曾無間言敬愛良人

禮節周旋才雖不敏志識多賢我行四方仕路回環留
君侍傍以悅親顏君稟弗強為疾所纏數經危殆復幸
平痊時不少須氣血消殫豈謂一疾永訣終天常時介
來書翰盈牋今以訃聞一語不傳屬續之際念予在遠
想君此心欲語誰展孰不夫婦義薄情專義重于情惟
君則然阿翁慟哭白髮垂肩兒女蹣蹣呱泣漣漣君去
不顧亦何忍焉傷哉久貧囊無留錢養生治疾藥餌不
全以貧準灾庶幾少延吾言既屢君志亦堅我夢不祥

歸心如湍形不能馳以危為安粥藥不親衣食不見雪
涕西風北懷千萬山川悠悠霜月苦寒君何所歸長夜
漫漫時服一襲酒肴一盤遥寫我悲何以自寬

祭陳運判夢兆

嗟夫人不知心中道而反苟其知之奚論歲晚惟予不
肖寓居衡山中列于朝其職可言利病之悉得于民間
有二千石虐及糶鰥有部使者營私畔官相與奉承一
道永嘆常以上聞天討厥奸其後來者視予仇冤首尾

四人先後三年謗而傷之欲禁其宣平生善交聽之于
遠心為我危舌為彼卷卓哉惟公素無半面持節平楚
厚相慰荐予方大憂臥苦斬然既旅其處又營新阡非
公仁明軫茲孤孱使彼忌者尚爾持權雖有誠信豈無
悔焉公才利決忍無留難百里所恬千里所安眷言三
相邈于帝關劇盜之餘比罹旱乾饕吏牙之益困于殘
自公下車深鋤其患脩白者舉反此者按曾未幾時民
瘼稍痊而公病矣弗佑于天天不可期曷禍于賢聞公

之計有涕漣漣以德報德以直報怨先聖所許人道所
建嗟公已矣我報未展姑酌一觴千古之醞

祭侯郎中思孺

古語有之生若浮萍死若逝水顧所立之如何曷耄期
而後喜公奮跡於寒鄉飛英聲而跣跣躡俊造之上游
決高科而鵲起睇雲霄如咫尺陋一息而千里總泮水
之弦歌飫瀛洲之圖史經握蘭于華省尋仗節于使指
師作新之術業稟紹承之道揆宜所懷之亟展誰使行

而尼止雲濤洶乎三峽傲扁舟于展履笑委禽于德耀
豈夢雨之可擬抗鐵冶以窮年困鹽車而垂耳脩蹭蹬
于晚迹撫壯心而未已監武林之小城刺炎陬之窮壘
復撼頓于師言遂逍遙于岳趾飯疏食而奚怨衣緼袍
而孰恥吾先君之息駕屏世紛而莫邇公不倦於叩門
矧復齊于甲子有若我之愚慙嚴禮貌而弗鄙貽冰柱
之大篇貺長須之雙鯉越既久而益勤不自尊于髮齒
擷南山之紫翠酌北澗之清泚稽宏論而茫洋齊譎恠

與倣詭會予馬之遠適來重諾于離仇曾轉首而幾何
遽驚心於哀誅惟公才之放逸若漲川之無涘騰意氣
于風雲絢詞章于霞綺逮憂患之霧蒙投佛海而自洗
嘆白足之無人領青衿之長跪晚乃弄夫墳典悟曩得
之非髓摩治忽于往聖欲論患於旒宸諏諸生以衆說
默瞑聽而隱几決去取於須臾俾授辭而落紙粲大義
以盈編閱日月而甫爾仰精爽以翹翹抗談端而靡靡
咸祝公於三老何奄忽於一逝云春秋與易傳尚胸次

之盤峙嗟後學之莫知悵斯文之已矣想殷勤之故情
慘悲風而涕委魂兮來哉歆此芳醴

祭李待制似矩

惟公生稟異才夙存遠志佩鈎繩而帶規矩推四重於
士林窺戶牖而考淵源會九流於皇極譽髦昭代振羽
高衢持橐從行言必忠嘉之告宣威作屏治稱師帥之
良踐更內外而公望愈隆經歷艱難而誠心益著柄臣
不能以非道屈致天子嘗欲以大政倚毗軒冕倘來宣

隨人而俯仰山林獨往聊卒歲以優游濯纓紱於滄浪
結茅茨於紫翠縹馬閭風之苑騎鯨渤海之波厭雞虫
得失于堦除付鵬鷃逍遙于宇宙方欲拉喬松而玩倒
景友期羨而游太清屬聞讎敵之詭盟深慮覆車之併
轡拜章極論寧曰身謀納祿告歸庶幾王改清議終期
于岩石耆年俄迫于逝川縉紳歌不慙以興悲邦國歎
云亡而增瘁永惟先子早揖俊遊道不逢時嘗草歸田
之賦義深引重俾彈掛壁之冠逮茲臬楔之凡材亦借

丹青之妙手雖薦賢舉類公心自比於上臣而被遇辱
知我意實同於國士載念寢苦之日方來脩奠之詞歲
月未幾老成繼往憫餘生而獨在展新兆以無緣愴懷
倍切於尋常哀誄莫陳於彷彿英魂未泯旨酒來歆

祭陳少卿幾叟

人生孰不有知今惟無學之足患束帶秉笏孰不慕君
今能行義之為難昔先覺曰龜山丈人今實伊洛之回
騫公服膺其左右今由綠髮而華顛有諫大夫了翁今

匪躬蹈難而不變謂公為吾賢孫兮付志業之未宣公
受資既遠絕於人兮天又玉之以百艱偉發身於英妙
兮落組麗而雄健中優柔以饜飫兮求精粹而窮研探
閫奧發其秘兮坦坦道而是踐後來者雜沓橫出兮邁
五十矣而青綸沉伏百寮之下兮突晝冷而蔬飯羞折
腰於五斗兮亦何冀乎九遷凜大冬萬木慄以標兮獨
長松鬱乎蒼翠倘匠石欲成厦屋兮無寧弃而弗挺遂
觀珍於玉海兮遂佐御史而執憲遂進預七人之列兮

遂掌禮樂而司存皇清問訪古道兮又前席於講幄之
筵公以所受於師者兮單厥心而薦聞以所承於家者
兮祇乃事而辯論何忽然而去國兮曾坐席之未溫主
施厚庸酬荅兮道不可枉以求安知我者相期於國士
兮胡敢衆人而報恩耿薄雲之乎太空兮輕塵棲裊裊
乎弱管據鐘鼎豈不有命兮還食薇於故山強哉矯不
變塞兮亦得正而斃焉予先君子器愛兮逮晚歲而益
敦既論獻於冕旒兮復重之以婚姻公歸兮邈無緣一